

He Whakatau

Me mātua pānui kia mārāma rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. He aha ngā āhua i mōhio koe? Pēhea te tōrino? Kei roto i te pukapuka *Ngā Tōrino* ngā momo tōrino. Pānuitia!

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia he āhuahanga pāngarau e mōhio ana te ākonga. He aha ētahi mea e kitea ana i roto i te akomanga, he ōrite te āhua ki aua āhuahanga?

Matapakia te āhua o te tōrino. Kimihia ētahi mea kei roto i te akomanga he ōrite te āhua ki te tōrino.

Whiriwhiria he huarahi ka whāia ki te hanga tōrino.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārāma ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. I hangaia ētahi tōrino e rua, i roto i te pukapuka, ki te aha?
2. I pēhea te hanga a tōku tuakana i tana tōrino?
3. Nā wai aua tōrino i mahi?
4. Ko tēhea o aua tōrino te mea mauroa rawa? He aha ai?
5. Ki ōu whakaaro, he aha te mea uaua rawa ki te whakamahi? He aha ai?

Ngā whakautu ki ngā whakapuaki māramatanga

1. He parāoa, he pōkai taura, he kiri āporo, he rākau, he kāri, he parāoa pokepoke, he one.
2. Ka tapahi i te kāri.
3. Nā Māmā rātou ko Pāpā ko Kui ko Koro ko te tuakana ko te tungāne ko te kōtiro.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

I He whakarōa atu i ngā mōhiohio mai i te pukapuka.

He whakatakinga ā-roro, he whakaharatau

I mua i te pānui i te pukapuka, matapakia ētahi mea he ōrite te āhua ki te tōrino. E mōhio ana te ākonga nā wai aua mea i mahi?

Kia oti i te ākonga te pukapuka te pānui, kōrero mō ngā momo tōrino i roto i te pukapuka. Nā wai aua mea i mahi, ā, i pēhea i hangaia ai?

Matapakia ētahi mea o te ao tūturu (hei tauira: he tētē, te anga o te pūpū) me ētahi nā te ringa tangata i hanga (hei tauira: kōwiri mētara, te aho waea) he ōrite te āhua ki te tōrino.

Kōrerorerotia te whakamahi i te tōrino hei tohu, hei waitohu rānei (hei tauira: te tohu o Whakaata Māori, te koru o Air New Zealand). He aha ētahi ariā tērā pea ka tohua e aua tōrino?